

Wanita UMNO diseru fahami dasar parti

TANAH MERAH, Ahad — Isteri Timbalan Menteri Besar Kelantan, Hajah Nik Azizah Nik Yahya, menyeru pemimpin-pemimpin Wanita UMNO peringkat cawangan memahami perlembagaan parti dan perlembagaan negara.

"Dengan ini, pentadbiran parti akan berjalan lebih licin dari masa ke semasa," katanya.

Hajah Nik Azizah berkata, UMNO sekarang sudah menjadi sebuah parti terbesar dan terkuat di negara ini. Oleh itu, banyak persoalan patut diketahui oleh pemimpin-pemimpin Wanita UMNO di peringkat cawangan.

Beliau berkata demikian ketika berucap merasmikan kursus kepimpinan Wanita UMNO Kawasan Jeli di Sekolah Kebangsaan Jeli, 40 kilometer dari sini, semalam.

Tegasnya, tugas Wanita UMNO, khususnya di peringkat kampung dan cawangan, penting dalam perkembangan dan perjuangan parti di negara yang sedang membangun sekarang.

Berjasa

Beliau menarik perhatian kaum wanita, UMNO ialah satu-satunya parti yang dianggotai oleh se golongan besar orang Melayu di negara ini.

"UMNO telah banyak berjasa kepada negara dan bangsa, dan di Kelantan, kerajaan Barisan Nasional banyak membuat pembangunan untuk masyarakat terutama di kampung-kampung," tambahnya.

Di samping itu, katanya, kerajaan juga memperuntukkan bantuan di bawah Amalan Makanan dan Pemakanan (AMP) untuk anak-anak miskin di sekolah-sekolah.

Hajah Nik Azizah juga mengingatkan pentingnya peranan ibu-ibu dalam memberi pelajaran kepada anak-anak untuk menjadi warganegara yang berguna.

Beliau berharap, kaum wanita terus mengekalkan hubungan silaturahmi sesama mereka untuk kepentingan parti, agama dan negara.